

Sanz: «Oposizio gogorrek mesede egin dio UPNri eta kalte PSNri»

CISen arabera, UPN bost puntu igoko da eta PSNk behera egingo du

UPNk PSN-PSOErekiko zuen boto abantaila nabarmen areagotuko da hurrengo hauteskunde nagusietan, CISek azaroan egin zuen inkestak dioenez. Miguel Sanz lehendakariordearen iritziz, sozialistek Nafarroako Gobernuari egin dioten «oposizio gogorra» da horren arrazoia.

A. UNANUE / IRUÑEA

Sanzek atzo azaldu zuenez, «inkestak argi eta garbi erakusten du Nafarroako Gobernuari egingo dako oposizio gogorrek ez diola inolako mesederik egin PSNri, bai ordea Gobernua sostengatzen duen alderdiari (UPN)». Ildo beretik, UPNri lagundu ez izana hauteskundeetan sozialisten kalterako izango dela gehitu zuen.

CISen inkestaren arabera, Nafarroako bi alderdi nagusiek Madrileko Kongresuan dituzten eserlekuei eutsiko diete hurrengo hauteskunde nagusietan, hots, UPNk 3 diputatu izango dituela eta PSNk bi. Botoei erreparatu gero, nabarmena da UPNren gorakada. Horrela, Jesus Aizpunen alderdiak 99.875 boto (% 38,9) eskuratuko lituzke, 1989an baino 7.659 gehiago. Bost puntu igo da, beraz. Alderdi sozialistak, berriz, 79.399 boto (% 30,9) besterik ez lituzke jasoko, duela lau urte baino 7.278 gutxiago.

Zera adierazten du horrek, hauteskundeak orain eginez gero UPN eta PSNren arteko aldea zortzi puntukoa eta 20.000 bo-



Miguel Sanz, Nafarroako Gobernuko lehendakariordea.

JOXE

tokoa izango litzatekeela, azken bozketakoa baino askoz ere handiagoa.

Sondeoak dioenez, Herri Batasunak gora egingo du Nafarroan. Ia bi puntu igo dezake, 33.092 botorekin eta 200 boto besterik ez zaizkio falta Madrileko Kongresuan ordezkaria izateko. Hala ere, gorakada nabarmenena Izquierda Unidak erakusten du. CISen arabera, IUK 20.473 boto lortuko lituzke, azken hauteskunde nagusietan baino 4.500 gehiago. Eusko Alkartasunak, berriz, duela lau urteko emaitzari eutsiko lioke, 13.382 botorekin. Dena den, bi alderdi hauek diputatua lortzeki urrun daude oraindik. Azpimarratzekoa da, bestalde, CDS ia desagertu egiten dela.

ALLI POLITIKARI PREZIATUENA

Nafarroako politikariak baloratzekoan, Juan Cruz Allik lortu du puntuaziorik onena, 4,8 puntu hain zuzen.

Atzenak geratu dira Gabriel Urralburu (4,2), Felix Taberna (3,5), Iñaki Cabases (3,4), Jaime Ignacio Del Burgo (3,14) eta Patxi Zabaleta (3,14).

Nafarroako Gobernuaren jardunari dagokionez, nafarren % 27k «ona» izan dela diote, % 13k «txarra» eta gehienek, % 48k, «tartekoa». Sanz pozik azaldu zen balorazio horrekin. Sanzen esanetan, «urte t'erdia pasa eta gero, Gobernu hau Nafarroan agintzeko gai dela ikusi ahal izan du hauteslegoak».

Inkestaren beste atal batean beren nazio sentimenduez galdu dituzte elkarrizketatuei. Erantzunen arabera, nafarren ia erdiak «nafarrak eta espainolak» sentitzen dira, % 19 «nafarrak eta euskaldunak», % 11 «espainolak soilik», % 10 «nafarrak bakarrak» eta % 7 «euskaldunak soilik». Nafarroa erregioa ala nazioa den galderari, % 79k erregioa dela erantzun diote eta % 10ek nazioa dela.

UPN eta PSN adostasun giroan bilduko dira gaur bigarrenenez

A. U. / IRUÑEA

Nafarroako Gobernuko eta PSN-PSOEko ordezkariak berriro bilduko dira gaur goizean, joan zen asteazkenean aurrekontu berrien inguruan hasi zuten negoziaketa segitzeko asmoz.

Bigarren bilera honen atarian adostasun giroa da nagusi. Miguel Sanz lehendakariordeak jakinarazi duenez, Juan Cruz Alliren gobernu taldeak sozialistek idatziz bidali dizkien proposamenak aztertu zituen atzo eta «balorazioa, oro har, positiboa da». Sanzen arabera, PSNk eginko zenbait eskaera —enpresa txikiei laguntzea, kasu— abian daude dagoeneko eta ez dute zailtasunik agertzen.

Hala ere, gaurko bileran erabateko hitzarmenik ez dela sinatuko adierazi zuen. «Ez da azken bilera izango», Sanzen esanetan, «gauza asko zehazteke daude eta. Esate baterako, 5.000 milioi pezetako (250 milioi libera) inbertsio fondoa zer-nola banatuko den argitu behar dugu». Lehendakariordeak azaldu zuenez, diru kopuru horren erdia iazko defizitetik hartuko dute, uste zena baino 2.500 milioi pezeta gutxiagokoa izan baitzen, eta gainontzekoa funtzionamendu gastuetatik kendu beharko dute.

Halaber, aurrekontu berriak lehenbailehen prestatzeko ahaleginak egingo dituztela esan zuen. Horrela, proiektua Aste Santua baino lehen bidali nahi dute Parlamentura, ekainean indarrean egon dadin.

Lehendakaria aukeratzeko modua aldatzeko eskaerari



Gabriel Urralburu.

JOXE

dagokionez, gai hori aurrekontuekin nahastearren kontra agertu zen lehendakariordea. Sanzek esan zuenez, «denok onartzen dugu sistema aldatzeko premia, baina une honek lehen tasuna aurrekontuek dute. Aurrerago negoziatuko dugu zer sistema den proposena». Era berean, gai hori buruzko erabakia Nafarroako Gobernuari baino UPNri dagokiola gehitu zuen.

Gauzak honela, UPNk agintea hartu zuenetik ezinezkoa izan den akordioa bidean dagoela dirudi. Lehenik eta behin, UPN Foru Hobe-kuntzaren 29. artikularen aldatzea negoziatzeko prest agertu delako aurrenekoz. Bestetik, aldatzea horren truke sozialistak elkarlanerako prest agertu direlako. Sanzek atzo esan zuenez, PSNren jarriera aldatzeko badu zerikusia hainbat inkestak iragarri duten boto galerarekin.

EAJren hauteskunde egitarauak enpleguaren sorrera du ardatz

BILBO

Euzko Alderdi Jeltzalea hurrengo hauteskundeetarako prestatzen ari den egitaraua enplegu sorreran oinarrituko da. EBBren agindupean lanean diharduten zortzi batzordeak bat etorri dira egungo arazorik larrienari aurre egiteko premia finkatzeko orduan, ekonomi krisia eta langabezia alegia.

EAJren hauteskunde batzordeak bideragarritasuna eta irudimena uztartzen dituen ekonomi konponbideak bilatu nahi ditu. Kontuan hartuko ditu bide horretan bere esku dauden tresna politiko zein instituzionalak, ustezko konponbideetan oinarritzeko hauteskundeetarako egitasmoa.

EAJk zortzi batzordenen esku utzi du egitarauaren itxuratzeari, ekonomi eta industri politika; azpiegiturak, garraioa eta ingurugiroa; enplegua, ongizatea, osasuna eta gizarte segurtasuna; hezkuntza, kultura, kirola eta euskara; kanpo politika; autogobernua, estatutuaren garapena eta Europa.

Batzorde hauetan 150 bazkide inguru ari dira, teknikari, udal eta EAEko Administrazio arduradunak eta EBBko kideak. Jeltzaleek estatutuaren arabera EAeri dagozkiokeen ahalmenak berehala transferitzea eskatu dute. EAJk Madrileko Gobernuak azpiegitura eta inbertsio alorrean hartutako konpromisuei aurre egitea eskatuko du ostera ere.

Demoscopiak egindako sondaketa

DONOSTIA

«El Pais» egunkariarentzat Demoscopia etxeak egindako hauteskunde sondaketaren arabera, Hego Euskal Herrian ez litzateke aldatzea handirik izango datozen hauteskundeak orain eginez gero. Alderdi gehienek duela lau urte lortutako eskainu kopurua berriro eskuratuko bailukete. Bestalde, kontuan hartu behar da, Bizkaian eta Gipuzkoan eskainu bana gutxiago dagoela lehian, demografiaren beharrek eraginda.

Nafarroan, Demoscopiaren sondaketaren arabera, UPNk hiru diputatu lortuko lituzke eta PSN-PSOE bi, aurreko hauteskunde legislatiboetan bezala. Araban ere emaitzak errepikatu

egingo lirateke inkesta honen arabera: PSE-PSOE 2 diputatu, PPK 1 eta EAJk 1. UAK ez luke ezer lortuko. Gipuzkoan, PSE-PSOE bigarren diputatua galdezake eta EAJk bigarrena irabaz dezake. HBk beste 2 lortuko lituzte, eta EAK orain daukan bakarra gorde egingo luke.

Bizkaian, PSE-PSOE eskainu kopuru bera (2) lortuko luke, PPK bigarrena lor dezake, EAJk 1989ko hiru diputatuak eskuratuko lituzte, HBk 2 diputatu eta Eusko Alkartasunak orain daukana gal egin dezake.

Euskadiko Ezkerra ez da agertzen boto asmoari buruz Demoscopiak martxoan egin zuen sondaketen emaitzetan. Aurreko hauteskundeetan, bi diputatu lortu zituen EEK.

«El Pais» egunkariak argitaratu duen Demoscopiaren inkestan ez dira agertzen alderdi politikoek Hego Euskal Herriko herrialdeetan lortzen dituzten boto asmoen portzentaia. Espainiako hauteslego guztiari dagokionez hauek dira alderdi abertzaleentzat: EAJk 1,2 (1989an bezala), HBk 0,9 (1,1 1989an), EAK 0,5 (0,7 1989an).

Demoscopiak 10.000 botoemaileei egindako galdeketa arabera, PSOE boto galera handia izango luke eta PPK nahikoa irabaziko lituzke. PPK baino hiru eserleku gehiago soilik izango lituzte PSOE Espainiako Kongresuan eta EAJ eta CiUren diputatuak ez lirateke nahikoa izango PSOEren batera gehiengo absolutua lortzeko.